

# Remo Cavegn – nov parsura dal tribunal

Elecziuns dals dus Tribunals chantunals senza surpraisas pli grondas

DA MARTIN CABALZAR/FMR

■ **Remo Cavegn (PCD)** è vegnì tschernì cun in excellent resultat sco nov parsura, la vicepresidente **Ursula Michael-Dürst** confermada cun in flavel resultat. Da nov entran **Christof Bergamin (PS)** ed **Alexander Moses (PCD)** en dretgira. Pir en in segund scrutini vegnan er ils vegls **Fridolin Hubert (PCD)** e **Micha Nydegger (PLD)** confermads.


En la debatta d'entrada ha il parsura da la cumissiun da giustia e segirtad **Ilario Bondolfi (PCD)** constatà ch'il parsura actual dal Tribunal chantunal **Norbert Brunner (PCD)** ed il derschader **David Pedrotti (PPS)** han retratg lur candidaturas. La cumissiun recumonda da betg reelegger il derschader **Peter Schnyder (PBD)** per in'ulteriura perioda. Ella propona perquai d'elegger **Remo Cavegn (PCD)** sco nov parsura, da confermar la viceparsura **Ursula Michael-Dürst** e da reelegger ils derschaders **Fridolin Hubert (PCD)** e **Micha Nydegger (PLD)** e d'elegger da nov **Christof Bergamin (PS)** ed **Alexander Moses (PCD)**.

## PS, PBD e PPS contra PLD e PCD

Il schef da fracziun da la PBD **Gian Michael** recumonda da sustegnair las candidaturas dals novs **Remo Cavegn** sco parsura ed **Alexander Moses** e **Christof Bergamin** sco novs derschaders. Per facilitar ina nova entschatta renunzia la PBD da purtar **Peter Schnyder** per ina reelecziun. Pli impurtanta ch'il proporz da partidas saja ina dretgira che funcziunia.

Il schef da la fracziun socialdemocratica **Conradin Caviezel** accentuescha che er sia fracziun avess giavischà ina nova entschatta cun novas persunas. Sco agen candidat proponia la PS **Christof Bergamin** che disponia gia d'esperienza giudiziala recaltgada en la Dretgira chantunala da Zug. El sa grà a la PBD, a la PPS ed a la PCD che pussibiliteschian almain ina midada parziala en la cumposiziun da la dretgira.

**Jan Koch**, il schef da la fracziun PPS, accentuescha la necessitad da recuperar la confidenza e credibilitad da la dretgira. Per la PPS na sajan perquai nagins dals derschaders en uffizi acceptabels. Cun renun-



**L'elecziun dals derschaders chantunals, normalmain ina chaussa «pro forma», ha procurà questa giada per vivas debattas en il Cussegl grond.**

FOTO OLIVIA AEBLI-ITEM

ziar da proponer ses derschader **Davide Pedrotti** fullia la PPS via per ina nov'entschatta. Il temp per tschertgar novs candidats saja stà memia curt, perquai avess la PPS preferì da spustar las elecziuns.

En num da la fracziun da la PCD recumonda **Reto Cramer** l'elecziun da **Remo Cavegn** sco nov parsura e la reelecziun dal derschader en uffizi **Fridolin Hubert**. Per che la dretgira possa funcziunar en sia nova cumposiziun a partir dal cumenzament da 2021 dovria ina tscherta cuntinuitad e stabilitad.

Da prender a mauns immediatamain saja ina reorganisaziun cumplexiva da la dretgira ed in rinforzament persunal da l'actuariat.

Tenor **Bruno Claus** è la PLD s'engaschada per in'examinaziun approfondida dal cas. El accentuescha dentant er che la

dretgira haja fatg – sper la critica giustificada – er buna lavur giudiziala. Buna e seria lavur haja er la cumissiun da giustia prestà e **Claus** sustegn las propostas da quella.

## Ina lantscha per Schnyder

Sustegn per **Schnyder** datti cunzunt dals deputads **Josias Gasser (PVL)** ed **Urs Hardegger (PBD)**. Sia qualificaziun giuridica saja incontestabla e mo grazia a ses engaschament sajan las mancanzas dal Tribunal chantunal vegnidas a la glisch. Ina saja uss betg giustificgà da chastiar el persunter. Critica vers il cumportament arrogant datti cunzunt er dals deputads **Lorenz Alig (PLD)** ed **Oliver Hohl (PBD)**. Lur agir saja stà nunprofessionnal, stinanza saja inacceptabla ed haja fatg donn a la reputaziun da la dretgira en la publicitad.

## Elecziuns e decisziuns

### Dretgira chantunala

**Remo Cavegn (CVP)** president (112 vuschs), **Ursula Michael Dürst (PLD)** vicepresidente (54), **Alexander Moses (PCD)** 106), **Christoph Bergamin (PS)** 96), **Micha Nydegger (FDP)** 63/70), **Fridolin Hubert (CVP)** 61/64)

### Dretgira administrativa

**Urs Meisser** president (98 vuschs), **Thomas Audétat** vicepresidente (109), **Elisabeth von Salis** (105), **Ramona Pedretti** (100), **Giuliano Recioppi** (96).

### Autoritad da mediaziun egualitad

**Rita Marugg**, **Karin Iseppi**, **Ylenia Baretta Mazzoni**, **Riana Schmid**, **Marco Ettisberger**, **Andrea Gautschi**.

### Dretgira da mesiras sfuzadas

**Annen Philip**, **Peter Guyan**

### Cussegl consultativ Viafier retica

**Felix Schutz**, **Peter Engler**, **Diana Costa**, **Anna Margreth Holzinger-Loretz**, **Barbara Gujan-Dönier**, **Janette Bürgi-Büchel**, **Margrit Darms-Landolt**, **Walter Hegner**, **Beat Deplazes**, **Franziska Preisig**.

### Iniziativa «Per la reducziun dal Cussegl grond – 90 bastan»

Approvò cun 107:0 vuschs da spustar la tractaziun per sis mais.

### Intermediaziun da lavur e segirada da dischoccupads

Approvò cun 110:0 vuschs la lescha correspondentia.

### Concordat e lescha davart gieus per daners

Approvò cleramain il concordat e la lescha davart gieus da daners per il chantun Grischun.